

可謂無此理也至於通商買銅兩款乃是從前懇求之事其所謂匿我遼民逞兇殺傷等語似指王萬才所言江原道逃匿漢人及頃日碧潼燒死遼民等事也碧潼逞兇之人已行究處江原道逃匿之說本出孟浪想督府猶未釋然於先入之言也且各道齊民任意買賣之請不須示以難色只以我國土瘠民貧本無畜積雖欲以有易無而自不得穰穰熙熙非敢禁止阻撓以孤厚望之意可也銅鐵則曾送一萬斤矣今又陸續輸運而非本國所產故湊合船運之際未免遲緩更令該部作急運送云云可也大槩帖中說話自上接見差官時既已即席酬答而亦非督府上前答揭之比不必及於回帖中只令今去重臣將前事意善為措辭導達俾知我國之情而但以大人前後周旋完此封典小邦臣民感戴欣悅之意備悉回帖宜當從之○北道旱乾豆滿江為淺灘○夜乾方坤方有氣如火光○癸酉慶尚道軍威地有牛產犢一身一頭兩耳四目兩鼻兩口○進士柳淹上疏陳時弊且言朴炆俞伯曾羅萬甲等以一時名流無罪補外此非昭代之事請起即召還以扶植敢諫之氣疏入不下○甲戌上朝講孟子于資政殿特進官金自點曰臣冒忝重任尋常恐懼頃日有物議故敢此待罪於榻前矣尹義立之女子乃仁發四寸妹也李曙為判尹